

A2^r

Dem Ehrnveften/ Fürfichti=
 gen vnd Weyfen Herrn Lazaro Setz=
 nern/ Funfftzehener Herrn deß Rathß
 der Freyen Reichs Statt Straßburg/ ꝛc.
 Meinem infonders Großgünstigem
 Herrn vnd Gevattern.
 EHRnvefter/ Weyfer/ Großgünsti=
 ger Herr vnd Gevatter: vnder anderen
 vortrefflichen Gutthaten/ darmit GOTT
 eine Statt vnd gantzes Land pflegt zu segnen/ ift diß
 nicht das geringfte/ daß Er in denfelben Gelehrte
 vnd Verftändige Leutte erweckt/ die der lieben Ju=
 gend zum beften Lößliche vnd Nutzliche Academien
 vnd Schulen auffrichten vnd anftellen. Dann was
 groffer Wolfand / Heyl vnd Froñen dem Gemei=
 nen Nutzen darauß/ beydes zu Geiftlichen vñ Welt=
 lichen Sachen / entfpringt/ bezeugt die Erfahrung.
 Ein folch edeles Kleynot/ haben auch wir / durch
 Gottes segē/ alhier zu Straßburg/ an der Lößlichen
 vnd weitberühmten Academien: in deren / fo wol die
 ingeborne/ alß von viel vñ weit gelegenen orten an=
 her gefchickte liebe Jugend / zur Gottes furcht/ allen
 gutten Künften / Sprachen vnd wolredenheit an=
 gezogen/ vnderrichtet vnd geübt werden: Neben
 welchen Exercitien vnd vbungen diß infonderheit
 zurühmen/ daß der Jugend zum beften/ vnd andern
 zur Lehr vnd Belüftung/ fchöne Comoedi vnd
 Tragoedien/ mit fonderm Lob/ vnd fo herrlich/ als
 etwan an einem ort/ Jährlichen gehalten werden:
 Vnder welchen actionen dann auch deß Sophoclis
 Ajax Lorarius zu finden: welche vor 21 Jahren/ ge=
 A 2 melter

A2^v

melter maffen agiert worden / wie ich diefelbige da= mals getruckt habe: vnd nun auch diefes Jar wide= rumb zuagieren vorgehomen ift. Weil aber von vielen guthertzigigen Leuten ich erfucht worden/ vmb deren willen/ fo der Lateinifchen Sprach nicht kün= dig/ diefelbig auch Teutfch in Truck zugeben / alfo hab ich einen guten Freund folchs zu vertieren ver= möcht: vnd vnder die Preß gelegt. Vnd damit fol= che Teutfche Verfion auch jhren befondern Patro= nen haben / vnd vmb fo viel mehr/bey etlichen/ denen dergleichen Arbeit gering fcheinet/ angenehm fein möchte: hab ich keinen beffern Herrn vnd Patronen erwehlen können als E. Ev. welcher / nicht minder / als obgemeldet/ von Gott dem Almechtigen/ darzu erwehlet vnd mit gnaden gefegnet / der lieben Ju= gend / vñ zwar allen Liebhabern Freyer Künfte zum beften / nicht allein mit Verlegung vnd beförderung vieler nützlicher/ herrlicher Bücher vnd Schriff= ten / deren fie viel vnd mancherley in Truck beförde= ren / zudienen: wie folches weit vnd breit bekind: fondern auch in diefer Statt der Jugend vnd Aca= demien in jhrem verordnetem Ampt / mit Rath vnd That/ das befte zu fuchen trewlich geneigt vnd affe= ctionirt ift. Gott der Allmechtige wolle mit feinen Gnaden E. Ev. ferner fegnen / regieren vnd erhal= ten. Deme ich E. Ev. fambt derfelben gantzen Haußhaltung befehlen thu / mit Bitt diefe gering= fügige dedication im beften zuvermercken/ vnd gut= hertzig/ wie fie von mir gemeinet/ an vnd auff zuneh= men. Geben zu Straßburg den 4. Julij

E. Ev.

Dienftwilliger

Antonius Bertram/ Buchtrucker.

A3^v

Suñarifcher Jnhalt der gantzten Tragoedi
 PAris/ vnd sein Bruder Deiphobus/
 Wölln deß Hectors todt rächen mit Verdruß
 Am Achille: der mit Lieb war entbrand
 Gegen Polyxenam: weil ein Anftand
 Deß Kriegs gemacht war/ kam er zu der zeit/
 Jnn Hoffnung der Ehftand fey Jhm bereit:
 Gieng in Apollinis Kirch/ da sie zwar
 Jhn tödten / vnd lan Jhn vor dem Altar
 Dort ligen: Ajax holt balt den Leichnam:
 Vnd jagt hinweg die Feinde allefam:
 Daher kommen beyde theyl in ein Streit.
 Ajax auch mit Vlyffe zanckt/ auß Neydt/
 Vmb deß Achillis waffen: vnd wår schon
 Zur Fauft komen: wann nicht Agamemnon
 Die Sach den Kriegs Râthen hett heimgestellt:
 Doch der Außspruch dem Vlyßi zufellt.
 Solchs thut Aiaci weh: weil jhm allein
 Achillis waffen nicht gegeben feyn:
 Komt dadurch in schwere Vnfinnigkeit:
 Dem gantzten Lâger Er Vnglück bereit/
 Vnd nimt Jhm vor ein Nâchtlichen Einfall/
 Die Griechifchen Fürften zu tödten all.
 Aber die Göttin Minerva behend
 Gibt Jhm andern Sinn: vnd sein Augen blend/
 Daß Er ein gantze Herd Vieh richtet hinn/
 Vnd meint nicht anders in feim tollen Siun/
 Er hab die Griechifchen Fürften allfand
 Vmbracht. Bald komt Er wider zum Verftand:
 Klagt vnd beweint folche fchandliche That:
 Vnd weil Er zwar auch nicht gewohnet hat
 Mit Gedult zuvertragen Spott vnd Hon:
 Gibt Er vor/ Er wöll sich verfühnen schon.
 Geht hinn: Felt heimlich in fein eigen Schwerd/
 Durchs Blut verkürtzt Er jhm fein Leben werth.
 Agamemnon vnd Menelaus auch
 Verbieten / Jhn zubegraben nach Brauch:
 Welchs doch Teucer fein Bruder bitten thet:
 Dah er zanck/ Hader vnd Schmâhung endfteht.
 Aber Vlyffes ftillt die Vnrug fein:
 Daß Teucer Aiadem/ den Bruder fein/
 Recht ordentlich / als Er gewünfchet hat/
 Wie breuchlich war/ zu der Erden beftatt.

Der

A1^r

Teutfche
ARGUMENTA.
oder Inhalt der Tragoedien
deß Griechifchen Poeten So=
phoelis: genandt
AIAX LORARIVS.
Sampt
Einem Prologo oder Vorrede / da=
rauß der Jnhalt: vnd einem Epilogo oder
Befchlußred/ darinnen die Lehren diefer
Action kûrtzlich begriffen.
Gehalten auff dem Theatro zu
Straßburg / Anno 1608.
im Monat Julio.
Gedruckt zu Straßburg/ durch
Antonium Bertram.

A1^v

Prologus oder Vorrede.
HOchwürdig/ Durchleucht/ Wolgeboren
Gftreng / Edel / Ehrnveft außerkohren/
Fürfichtig/ Ehrfam Gnädig Herrn
Gant3 vnderthäniglich zu ehrn
Auch andre Herren in gemein
So viel der hie verfamlet feyn.
Vnd Erbare Frawen / zugleich
Jhr Jungfrawen gant3 Tugendreich.
Jn den Hiftorien wir lefen/
Wie das ein vefte ftat gewefen/
So man die Stat Troia genandt/
Gelegen in Phrygier Landt:
Welche von den Griechen auch war
Hart belegert wol zehen Jahr.
Jnn welcher belegerung eben
Mancher Held muft laffen fein leben/
Zum theyl von Feindes Hand im ftreit:
Zum theyl durch Betrug / Lift / vnd
Wie es dann heutigs tages auch (Neid
Jn Kriegsleufften noch ift im brauch
Da man mit Lift vnd gſchwindigkeit
Mehr vornimt als mit Schlacht vnd Streit:
Vnd nicht mit freyer Fauft viel mehr
Trachtet nach kriegs Ruhm / Sieg vnd Ehr /
Wer ietzt kan brauchen Lift vnd Tück/
Der meint er hab ſchon Sieg vnd Glück.
Daher manchen die Eytel Ehr
Vnd Ruhmfucht / auch reizet noch mehr/
Das

A2^r

Das er vermeint das Lob allein
 Müß fein / vnd keines andern feyn.
 Daher endteth vneinigkeith/
 Auch vnder Freunden/ offft zur zeit/
 Feindfchafft/ 3witracht/ ja Angft vnd Nor/
 Vnd endlich auch Schmählicher Todt.
 Deffen wolln wir jetzund Spielweiß/
 Ein Exempel mit fonderm vleiß
 Euch vorbilden. Jch bitt euch all/
 Jhr wollet vns in diefem Fall
 3uhören/ vnd darneben fein
 Euch vnd vns zu lieb Stille feyn.
 Damit jhr aber auch als balt
 Wiffen möcht/ was diß Spiel innhalt:
 So will jchs euch/ hie an dem ort/
 Itzt erzehlten / mit wenig wort.
 Als Achilles der Held ftreitbar
 Auch mit im Feld für Troia wahr /
 Vnd het von freyer Fauft / mit Macht
 Den ftarcken Hector vmbgebracht:
 Balt Paris vnd Deiphobus/
 Alls Hectors Brüder/ mit verdruß
 Solchen Todt zurächen gedachten:
 Vnd mit Lift folchen Anschlag machten:
 Als wolten fie Achilli eben
 Jhre Schwefter zum Weibe geben.
 Achilles balt/ in Lieb endbrand /
 Ließ jhm gefallen den Ehtand:
 Kam zu jhnen in ficherheit/
 Jnn ein Kirch vom Läger nich weit:

A2^v

Dafelbft er vom Paris/ mit Lift.
Verråtherlich erftochen ift.
Als folches den Griechen ward kund/
Kam Ajax / fein Vetter/ zur ftund:
Vnd den Cörper vom Feind errett/
Begehrt auch darauff an der ftett/
Das man jhm von Rechts wegen eben/
Deß Achillis Ruffung folt geben.
Solchs balt Vlyffes widerfpricht:
Biß fie komen fürs KriegsGericht:
Dafelbft fellet das End Vrthel frey/
Vom Ajax/ dem Vlyffi bey.
Solchs thut den Ajax hochbetrüben;
Der trachtet im Zorn Rach zu üben/
Vnd die Fürften zu tödten all;
Vnd wird vnfinnig in dem fall/
Das er ein Herd Vieh fchlegt mit Macht/
Vermeint er hab Menfchen vmbracht.
Da er wieder komt zum verftand/
Geht jhm ein folche R w zuhand/
Wegen deß Schimpffs/ Spot/hohn vnd Noth.
Daß er jhm felbft anthut den Todt.
Fellt heimlich in fein eigen Schwerd.
Alß folchs Teucer/ fein Bruder werth /
Erfahren hat: komt er alsbalt
Beklagt jhn/ vnd will der gefalt:
Den Leichnam gantz Ehrlich begraben:
Solchs will Menelaus nicht haben:
Wie auch Agamemnon zur zeit:
Darauß entftehet Zanck vnd Streit.

A3^r

Biß daß Vlyffes komt herbey/
 Der all diefen 3anck ftillet frey:
 Vnd gibt den guten Rath der maffen/
 Das man jhn foll begraben laffen:
 Drauff Teucer feins Brudern Leib auch
 Verbrennet nach Heidniſchem Brauch.
 Diß ift alfo kurtz der Jnnhalt/
 Wie jhr felbft werdet fehen balt.
 Jnn Vnderthânigkeit/ bit ich
 Jhr wöllet alle famentlich/
 Diefe Tragœdiam dermaffen
 Anhörn / vnd euch gefallen laffen
 Jnhalt deß Erften Acts.
 JM Erften Act werdet jhr fehen
 Die Betrieglichkeit einher gehen:
 Die rühmt ſich jhrer Tück vnd Lift/
 Vnd was ſie treib zu jeder frift.
 Deiphobus vnd Paris auch
 Berathſchlagen/ nach jhrem Brauch /
 Wie jhnen doch möchte gelingen/
 Achillem mit Lift vmbzubringen:
 Vnd machen endlich den Anſchlag/
 Das ſie jhn/ auff einen FeſtTag/
 Jnn eine Kirch/ zu jhnen beyden/
 Jnn eim Friedftand/ zu ſich beſcheiden/
 Vnder dem Schein/ als wenn alda
 Jhre Schweſter / Polyxena/
 Auß Lieb feiner zur Eh begehrt.
 Achilles komt bald ohn beſchwer/

A 3

Vnd

A3^v

Vnd vertrawt jhrem Falfchen Wort
 Vnd wird verrâtherlich ermordt.
 Die kundſchafft komt ins Lâger balt
 Darumb zeucht man auß mit gewalt.
 Aiax den Todten Leichnam will
 Jnns Lâger tragen in der ftill.
 Vnd wird darob von Feinden allen
 Gantz vnuerfehens vberfallen.
 Doch fein Volck jhn trewlich endfetzt /
 Vnd kombt zu einer Schlacht zuletzt
 Die Griechen die Troianer jagen.
 Aiax / der den Cörper getragen/
 Begehrt feiner Trew zugedencken/
 Jnn dem daßman jhm bald foll ſchencken
 Des Achillis Rûftung/ dermaffen:
 Solchs will Vlyffes nicht zulaffen:
 Als welcher deren auch begehrt/
 Vnd vermeint er fey jhrer werth.
 Darüber zancken ſie zugleich:
 Vnd wer auch ſchier komen zum Streich /
 Wenn nicht Agamemnon alsbalt/
 Solchs hett geftillet mit Gewalt.
 Jnhalt deß andern Acts.
 JM Andern Act fitzen zufamen
 Die Kriegs râth / allein in dem Namen/
 Das ſie wollen ein Vrthel fellen
 Wem man / mit Recht/ könne zuftellen
 Achillis Rûftung/ des ſie fey.
 Neftor fagt feine Meinung frey

Das

A4^r

Das man sie schicken Pyrrho beim Sohn/
 Gen Pthiam/ oder gen Scyron.
 Diomedes/ solchs widerspricht/
 Vnd seine meinung dahin richt:
 Das man sie geb Vlyffi sein.
 Ajax wills nicht gut lassen feyn/
 Sondern veracht Vlyffem fehr/
 Rühmt dargegen sein eigne Ehr /
 Vnd seine Thaten auch darbey/
 Drumb er der Waffen würdig sey.
 Vlyffes/ gantz Befcheydentlich
 Redt sein Glimpff/ vnd verantwort sich:
 Bitt auch das man die Rüstung eben /
 Vmb sein verdienft/ ihm wolle geben.
 Menelaus / gleicher gefalt
 Spricht sie zu dem Vlyffi balt:
 Darüber Ajax viel draw wort
 Außtoft/ vnd laufft im Grimm balt fort.
 Ajax Oileus/ helt dafür /
 Das Aiaci mit Recht gebür
 Die Rüstung / wegen seiner That.
 Jdomeneus / gibt den Rath/
 Das man sie Vlyffi verehr.
 Eurypilus der will vielmehr;
 Mann soll sie schicken gen Scyron/
 Dem Pyrrho/ des Achillis Sohn.
 Zuletzt wirt Calchas der Prophet
 Auch gefragt: der mit harter Red
 Sie trifft. daß sie der Götter Rath
 Suchen/ wann es schon ist zu spat:

A 4

Vnd

A4^v

Vnd geht im Zorn weg/ weil er nicht/
Das man feines Raths achtet nicht.
Vlyffes den Außspruch erhelt/
Dem die Rũftung wird zugefeltt.
Darauff komt Ajax balt von finnen/
Vnd thut feiner feltzam beginnen.
Minerva hilfft ihm darzu frey/
Vlyffes fteht auch hart darbey/
Der hõrt vnd merckt allen Vericht:
Wiewol jhn Ajax fiehet nicht.
Endlich/ komt Ajax vngefehr/
Vnd bringet einen Bock daher/
Mit dem er treibt viel Gãucherey/
Weil er meint daß es ein Menfch fey.
Ajacis LandtsLeut ihn beklagen
Vnd viel von feinem Vnglũck fagen.
Jnhalt deß Dritten Acts.
JM dritten Act gehet herein
Tekmeffa/ des Ajax Weib fein.
Die klagt vber die Tobfucht fchwehr/
Damit er fey beladen fehr.
Als balt fich auff den Plan darftellen
Von Salamin Ajax Gefellen.
Denen erzelt Tekmeffa frey/
Alles wie es ergangen fey
Jnn dem fie jhnen folches fagt/
Komt Ajax/ vnd fich hefftig klagt/
Wegen der That/ die er vollbracht:
Vnd fürcht er werd dadurch veracht /

Ja

A5^r

Ja zu Spott vnd zu fchanden werden:
 Darumb will er nicht mehr auff Erden
 Leben: Sondern frey in Vnmut
 Er jhm den Todt felbft wünfchen thut.
 Darzu låßt er beruffen balt
 Sein Söhnlein / welchs er der gefalt/
 Alls was es thun foll/ informirt:
 Vnd feine Freund valedicirt.
 Sein Weib voll Trübfal/ angft vnd fchmertzen /
 Bitt vnd führet jhm viel zu Hertzen.
 Aber fie kan darmit jhn doch
 Zu keim andern bereden noch.
 Die Salaminifch Gefellchefft frey
 Beklagt fein Vnfall mancherley.
 Letzlich komt Ajax/ zu der frift/
 Vnd beredet fie all mit lift /
 Als hab er nun ein andern Sinn/
 Vnd wöll andechtig gehen hinn /
 Sich mit Waffer zuweyhen rein/
 Daß er der Sünd mög ledig fein:
 Vnd fich mit der Minerua auch
 Verföhnen / nach Heydnifchem Brauch:
 Darneben auch fein Feindlichs Schwerd
 Heimlich vergraben in die Erd.
 Solchs glaubt jhm die Gefellchafft frey/
 Vnd wird widrumb erfrewt darbey.
 Jnhalt deß vierdten Acts.
 JM Vierdten Act ein Bott komt balt/
 Der bringt Bottfchafft/ welcher gefalt

A v Teucer

A5^v

Teucer ins Läger komen fey/
 Vnd wie man jhn empfangen frey
 Mit Spott vnd Schmach: ja an der ftet
 Jhn auch bey nah gefteinigt hett.
 Vnd als er nach dem Aiax fragt/
 Wird jhm von der Gfellchafft gefagt/
 Das er erft fey gangen von Hauß/
 Ein Gottes dienft zurichten auß.
 Darauff der Bott erfchrickt/ vnd fpricht/
 Man folt jhn ia bey leiben nicht
 Auß dem Hauß laffen gehen eben:
 Dann folches werd koften fein Leben.
 Als folchs Tekmeffa auch hört fagen/
 Da erhebt fich ein Newes klagen.
 Sie feind beftürtzt/ vnd fuchen doch/
 Ob fie jhn möchten finden noch.
 Aiax rufft vnd fteckt das Schwerd feyn/
 Damit er recht mög fallen drein.
 Darnach er fein Valete fpricht/
 Vnd im grim felbften erficht.
 Der Bott folchs alsbalt kundbar macht:
 Welchs von Fürften erft wird veracht.
 Doch Vlyffes fie fein befcheiden
 Vermahnt/ gegen jhm zum Mitleiden.
 Teucer beklagt feins Brndern Todt.
 Tekmeffa fchreit mit Angft vnd Not.
 Vnd als jhn Teucer will dermaffen
 Zu der Erden befattan laffen /
 Da kompt Menelaus herbey/
 Vnd will jhm folches wehren frey.

Darauß

A6^r

Darauß erhebt sich Zanck vnd Streit.
Menelaus geth auff ein Seit.
Teucer befiehl den Leichnam schon
Zuverwahren Aiakis Sohn:
Vnd setzt ihn zu dem Cörper balt.
Er aber / geht weg / der gefalt/
Daß er das Grab bestelle fein/
Dahin er soll begraben feyn.
Inhalt deß Fünfften Acts.
Im Fünfften Act komt Teucer frey/
Vnd Agamemnon auch herbey:
Die zancken beyde/ folcher maffen /
Weil Agamemnon nicht will lassen
Begraben den Leichnam zur Erd:
Darob macht sich Teucer beschwert:
Einer dem andern vnverzagt/
Im rechten Ernft/ die Meinung sagt.
Endlich kombt Vlyffes herbey:
Vnd als er hört/ was der Zanck fey:
Gibt er gantz gründlichen Bericht/
Warumb man kön abschlagen nicht
Dem Leichnam die Begräbnis frey /
Ob er schon jhr Feindt g'wefen fey.
Balt Teucer rüftet zu der Leich/
Wie auch die andern all zugleich:
Vnd nach dem folches ift vollendt/
Tritt Teucer auff/ am selben End:
Vnd thut die letzte Klagred feyn:
Gleiches falls auch Tekmeffa fein:
Vnd

A6^v

Vnd Euryfaces auch darneben.
 Aiax Sohn / der noch war im Leben/
 Welche jhn all trawrig beklagen
 Vnd jhm den letzten Lobſpruch ſagen.
 Der Priefter das Opfer verricht/
 Vnd fein Gebet darneben ſpricht:
 Vnd alfo ſie den Leichnam haben
 Auff Heydnifehe Weyſe begraben.
 Epilogus oder Beſchlußred.
 WEil nun die Zeit verfloſſen iſt/
 Vnd wir jetzt ſollen zu der frift
 Diefes Tragœdi Spiel beſchließen:
 So bitt ich/ laßt euch nicht verdrieffen/
 Auch kûrtzlichen zuhören frey/
 Was wir ſollen Lernen darbey.
 Vnd Erftlich / mercket fein alfo/
 Am Paris vnd Deiphobo/
 Ein Exempel / eins Falſehen Hertzen:
 Welchs Mord vnd Lûgen helt für ſchertzen:
 Vnd fürchtet weder Gott noch Ehr.
 Dern man heütigs Tags findet mehr.
 Die im Mund führen gute wort:
 Aber im Hertzen Neyd vnd Mordt.
 Drumb hût man ſich vor ſolchen gſellen /
 Dann ſie eim nach dem Leben ſtellen.
 Wer ſeinem Feind vertrawt zu viel/
 Der ſetzt jhm ſelbft des Todes ziel.
 Het ſolchs Achilles betracht eben/
 So wer er nicht komen vmbſ Leben.

Aber

A7^r

Aber feine Leichtfertigkeit/
Vnd Blinde Liebe zur vnzeit/
Vnd daß er nicht Standhafft allein
In feim Beruff ift blieben fein /
Das hat jhn gebracht in Gefahr /
Vnd endlich vmb fein leben gar.
Wer nicht emblich bleibt jeder frift
Jnn dem / das jhm befohlen ift/
Sondern geht auch nach andern fachen/
Der wird jhm felbft ein Vnglück machen.
Aiax foll vns fein ein Vorbild/
Eines Menfchen/ der frech vnd wild
Nuhr nach zeitlichen Ehren tracht/
Darbey Gott vnd Menfchen veracht.
Eim folchen kan es nicht wol gehen.
Sein Hochmut kan nicht lang befehen.
Wanns nicht gleich geht/ nach feinem finn/
So wirfft man alle Sanfftmüt hin:
Nuhr oben auß vnd nirgend an:
Zuletzt muß man den fchaden han.
Vnd der vor alles hett gewagt/
Der wird endlichen gar verzagt/
Daß er auß vngedult darneben/
Sich felbften bringet vmb fein Leben.
So gehets/ wann man ift verrucht/
Hochmütig/ Frech vnd voll Ehrfucht:
Daß man zu letzt in Todes Gfahr/
Gleich wie Aiax / verzweifelt gar.
Drumb fürcht Gott mit wahrer Demut:
Vnd begehrt nicht ein frembdes Gut:

Auch

A7^v

Auch was dir nicht/ nach deinem willen/
Kan werden / des vergiß in ftillen:
Lern auch dein Creutz gedultig tragen /
Daß du nicht müßt zu letzt verzagen.
Teucer ist auch ein schön vor Bild/
Der Brüderlichen Liebe mild:
Der sich trewhertzig/ als sich zimt/
Des verstorbenen Leichnams annimt:
Damit er Ehrlich zu der Erd /
Als fein Bruder / bestattet werd.
Menelaus/ auß Haß vnd Neyd/
Vnd Agamemnon auch / die beyd
Seind ein Bild der Menschlichen gemein /
Die mit Rach vnverfünlich feyn:
Vnd da sie je nicht weiter können/
Dem Feind die Begrebniß Mißgönnen
Das sind Rachgyrig Hertzen zwar/
Die eim Menschen abschlagen gar
Die Begräbniß/ vnd was sonst gleich
Mehr gehört zu Ehrlicher Leich.
Hergegen Vlyffis Sanfftmüt /
Vns alle sampt erinnern thut /
Das man verfühlich sey im Leben /
Vnd auch den Feinden soll vergeben/
Vorab wenn sie mehr leben nicht/
Vnd ligen in Gottes Gericht.
Dann Rachgir ist für Gott nicht gut
Der solche greulich straffen thut.
Tekmessa ist ein Spiegel rein/
Darein wir sollen all gemein/

Ein

A8^r

Ein jeder in feinem Stand/ ſchawen:
Vnd dem Glück nicht zuviel vertrauen.
Sie war Reich/ (wie ſie ſelber ſagt)
Balt wird ſie ein Gefangne Magdt:
Vnd dann wieder gebracht zu Ehren:
Gleich drauff / komt Trübfal mit beſchweren
Gott kan erhöhen / gleicher gftalt
Wiederumb ernidrigen balt.
Drumb foll ein jeder nicht vermeffen
Jnn feim Stand fein: noch auch vergeffen
Wer er erftmals gewelt auff Erden /
Vnd was er noch endlich könn werden.
Komt etwan ſchon ein Vnglück balt:
Verzag drum nicht/ folcher gefalt:
Dann es ſteht alls in Gottes Henden/
Er kans fenden/ wenden vnd Enden.
Vnd alles regieren ſo fein/
Das es vns doch muß Heylfam fein:
Damit wir preyſen feinen Namen /
Hie Zeitlich vnd dort Ewig Amen.

ENDE.